

南
雷
集

五



吾悔集題辭

吾母五子唯不孝親乳 先忠端公殉節之後室如懸磬
不孝支撐外侮缺掌家塾吾母課龍畝省廩害婚嫁有無
棺槨重複無一日之暇壬午冬吾弟皆以受室食指繁多
遂別晨春然夏稅秋糧猶不孝一人辦之際此喪亂貌是
流離身挽鹿車投足無所由是家道喪失吾弟復去其三
霜露晨昏兼并一人魚菽取備鮮適莫構吾母猶然憐余
之辛勤也凡居憂者以喪服爲之文以不飲酒食肉處內
爲之實不孝行之半年而一病支牀氣血中稿親友遂引
禮經有疾七十二條來相勸勉不孝姑息從之惶恐無地
自念養生送死多少不盡分處未嘗不痛自勉強而悔其
有所不能也樂正子春之母死五日而不食曰吾悔之自

吾母而不得吾情吾惡乎用吾情疏謂禮三日不食吾悔之者悔其不以實情勉強而至五日也夫子春之悔悔其過乎禮也余之悔悔其不及乎禮也同一勉強也若似乎余之情實子春之情僞然其僞者一悔而卽實而余之實者益終身悔焉而未有已也

吾悔集序

已未冬吾師梨洲先生以及門之請出南雷文案授斯大
斯大敬受手較付梓踰月先生有太夫人之變哀號孺慕
幾不欲生四方人士乞銘問序質疑考道者踵接于門先
生泣血辭曰吾何以文爲哉來者惻惻若失斯大曰此非
求文時也姑待之既先生治塋畢求者益來先生泣辭曰
吾何以文爲哉斯大間進曰居喪不文誠是也雖然先生
於太夫人之卒也含歛之事無不親之其塋也窀穸之事
無不親之禮所稱必誠必信弗之有悔者先生其是矣今
兆域已封桑主旣祔禮著居喪之節七十惟衰麻在身飲
酒食肉處于內太夫人年九十先生已七十有一準之於
禮先生亦得自寬又禮三年之喪對而不問今諸君求而

先生應之準之於禮與荅問等也且觀諸求文者非昔之忠臣義士卽今之老成賢哲也非經義之討論卽理學之辯難也先生于後先人物臧否素定經義理學夙有成書此不過隨意拈毫便已因物肖形人人飽德非如他人之待于研索也若是則爲文亦無妨于哀慕先生而固辭之將使忠義之激烈老成之典型埋没于庸妄之俗筆而質疑考道者亦無由頓啓其迷其于世道人心沉屈何可勝道先生爲身計獨不爲世道人心計耶于是先生意少解乃于練後次第書之得如于首斯大請刻爲南雷續文案先生吁然曰吾悔之吾母而不得吾情惡乎用其情樂正子之言也吾于此有同悲矣遂以吾悔名其集康熙壬戌冬十月門人萬斯大百拜謹書

吾悔集目錄

南雷續文案

卷第一

先妣姚太夫人事畧

青詞

萬里尋兄記

山菴詩

葉公六桐改葬誌

汪魏美墓誌銘

陳定生墓誌銘

答萬季野喪禮雜問

謝臯羽年譜序

輪菴語錄序

卷第二

叙陳言揚句股述

汪氏三子詩序

題張子遊卷

題海昌六老圖

卓母錢孺人墓銘

雪中卽事詩

歸途雜憶詩

靈隱詩

大雪野祭詩

張仁菴大學說序

馮畱仙詩義序

過黃孚先小樓詩

過諸九徵書舍詩

張心友墓誌銘

答萬充宗論格物書

黃醒菴府君傳

陳叔大四書述序

章格菴先生行狀

卷第三

張元岫墓誌銘

卓子孟墓誌銘

吳處士墓碣

諸敬槐墓誌銘

腳氣詩

徐忠襄神道碑

高古處墓表

卷第四

李杲堂墓誌銘

鄭平子壽序

翁元語錄序

熊雨殷行狀

王義士傳

唯岑塔銘

鄭玄子述

唐氏家譜序

二欠詩

吾悔集卷之一

南雷續文案

男百藥較

先妣姚太夫人事畧

先妣姚太夫人生于萬曆甲午十二月初二日卒于康熙
庚申正月初十日享年八十有七十六歲而歸吾忠端公
天啓元年敕封孺人四年以御史覃恩再封孺人崇禎元
年詔封淑人十七年進封太夫人生五子長卽不孝宗義
次宗炎次宗會次宗轅次宗燮太夫人姓姚氏太僕寺卿
翔鳳之從孫女父諱克俊字順宇鄉飲大賓母徐氏世居
上虞之渣湖來歸時曾王父贈公會王母章太淑人皆在
堂三世同居內外數十人而太夫人長羣婦承巾奉帚羣
婦皆視一十六歲女子爲進退贈公治家嚴肅羣婦時有

譙讓而獨賢太夫人曰新婦大家氣度無儒酸農瑱之態
他日定爲貴人顧我不及見矣丁巳先公授寧國府推官
太夫人在寧國五年署中落然不聞人聲始入後出中間
不識司李廳屏癸亥入京師是時逆奄竊政黨論方興楊
左諸公多夜過邸寓議論時事燭累見跋僮婢頭觸屏風
而太夫人管勾茶鐺酒壘無失候魏忠節見過尤數每過
必以小人陰謀相告形之歎息忠節去太夫人迎謂曰得
無又有歎息事耶乙丑出都門明年而難作先公被逮太
夫人每夜向北辰而拜祈聲酸苦丙漏將盡聞者無不欲
泣先公遺命五子撫之群妾嫁之苟風波麤定不失爲黃
竹農家太夫人不忍嫁群妾皆聽其母家迎去每哭先公
至于暈絕不孝苦相勸解太夫人曰汝欲解我第無忘大

父枯壁書耳。蓋大父以義頑鈍於義出入之處。大書爾忘勾踐殺爾父乎。八字揭之於壁。義受教痛哭。太夫人哭乃止。天子既誅逆奄。哀憐忠死之家。副笄狄衣。加換三品。一時名公鉅卿皆就拜謁。問起居步幃。棖臬之間。天下想望風烈。太夫人初不以此自異。奉事兩人。寢門竈下。頌辱之任。加於娣姒。一等。王父病革。太夫人不煩諸父命。義出營棺木。得美櫬。王父見之而喜。謂太夫人曰。吾有三子在而。寃寥之事。惟一婦。是辨汝後。必有達者。王母之沒。適舉債六十金。太夫人盡出以供喪事。或言之急。而舉債舉債而不以應急。可乎。太夫人曰。更無有急於喪事者也。先公弟三人子五人。王父以先公無私積。將分財爲八。各授之王父喪後。諸父爲政曰。孫不得與子同盈縮也。於是五人受

四分之一太夫人訓諸子曰汝曹能讀父書先業有無不足計也崇禎末宗義宗炎宗會頗有時譽宗轅亦習科舉顧功名可以戾契致太夫人憂思稍解乃未幾而黨禍復興阮大鍼招搖白下儀部周仲馭出南都防亂揭集諸名士以攻之而以顧果宗義爲揭首次桐城左國棟宣城沈壽民大鍼得志修報復既曲殺仲馭左沈皆變姓名去遂批徐署丞疏逮果及義弘光遜位不及於難驚魂未定而四方兵起乙酉奉太夫人徙中村丙戌徙化安山丙舍丁亥返故居己丑山中亂徙邑城明年返故居丙申山中又亂徙半霖其秋返故居己亥海上亂防海之師望門而食徙三溪口明年冬返故居甲寅群盜滿山徙海濱之第四門乙卯後五月始返三十年之中流離轉徙屹屹靡有定

居其間與村郊之婦女持橐束縵而立塵起疾呼以遁須臾之命者又不知凡幾自乙卯以來風鶴稍息太夫人早起日誦金剛經一卷誦畢置曾孫小孩於膝口授唐詩絕句一二首暇則述閭閻碎事勾女孫輩一笑方謂此樂可常豈知安居數年亦爲造化之所吝耶古來章妻滂母受禍不過一時而太夫人始遭東林黨禍繼之以復社黨錮又繼之以亂亡捕獄則操兵到門避寇則連繩貫掌覆巢之後復遇覆巢辛苦再立之戶牖頻經風雨一生與艱危終始卽古來之節婦賢母著名不過一節而太夫人上書代死似忠愍之夫人膝下皆爲名士舉觴賜子似伯仁之母執經講舍諸生先起居太母似忠介之母九十萱親養堂束帛又似依齋之母隨舉一節皆應史法太夫人兼之

蓋天不以尋常婦女之境遇處太夫人太夫人亦遂破荒
於婦道母道之變局故五十稱壽祥光遍於帷帳一年廬
墓甘露降於青松豈非天也不孝宗義娶葉氏陝西按察
使憲祖之女宗炎娶徐氏叙州知府某之孫女繼馮氏宗
會娶梁氏總戎某之女繼劉氏貢生應期之女宗轅娶宋
氏連山知縣德洪之女宗彝娶姚氏孫男十四人百藥教
穀百行正誼教起百祿百家百乘教畱百儀百法百度百
城百易孫女八人曾孫十七人每當太夫人壽辰海內鉅
公多有傑作以表徽音哉山劉夫子徐忠襄施忠介相國
瞿稼軒朱文肅孫碩膚中丞方孩未陳于庭儀部周仲馭
徵君沈詹生蘇武子陳定生其著也數十年以來不特先
友已盡卽不孝知交亦且零落淪謝立言君子唯考信前

言銘此幽石知義說之不妄也

青詞

人窮反本疾痛則必呼天情至無文慈悲自能救苦伏念
先母太夫人二十三而爲命婦三十三而殤未亡五載宛
陵不聞聲於衙舍兩年都下長嘔泣於封章逮夫李固名
掛飛章范滂身橫獄戶太夫人哀祈宛轉慘此夕之孤星
行哭悽愴距黃泉之一線毀巢破卵之下女嫁男婚追旺
沒產之餘養生送死心力俱盡淚痕未乾二十年黨錮之
門庭風波無已四十載流離於道路喪亂孔多七婦皆亡
五子維二皇天后土鑒此青燈敝帷之心枯栢寒松兀然
天崩地裂之日壽登九十上帝不錫以三齡年倍四三先
公只得其一半相依母子永隔幽明痛割何言請求無路

家禮不作佛事尚似未經痛癢之言吾母日誦金剛豈敢遽改萱親之道禱安螺鈸白沙稟之北堂常念光明和靖豈非儒者爰集勝侶用翻龍藏清梵悠長儼慈音之在邇瑞容端好望鳩杖今來臨固知散花之魄定行皎月之路生前荼苦已滅於電光至性霜寒不隨乎薪盡

萬里尋兄記

義六世祖小雷府君諱璽字廷璽兄弟六人長伯震商於外踰十年不歸府君寃祈夢請卜之瓊茅蚌殼之間茫然不得影響作而曰吾兄不過在城內吾兄可至吾何獨不可至乎跣屣出門鄉黨阻之曰汝不知兄之所止東西南北從何處尋起府君曰吾兄商也商之所在必通都大邑吾盡歷通都大邑必得兄矣于是裂紙數千繕寫其兄里

系年貌爲零丁所過之處輒榜之宮觀街市間冀兄或見之卽兄不見而知兄者或見之也經行萬里三山獠洞八角蠻陬踪跡殆徧卒無所遇府君禱之衡山夢有人誦沉綿盜賊際狼狽江漢行者覺而以爲不祥遇士人占之問君何所求府君曰吾爲尋兄至此士人曰此杜少陵春陵行中句也春陵今之道州君入道州定知消息府君遂至道州徬徨訪問音塵不接一日奏厠置傘路旁伯震過之見傘而心動曰此吾鄉之傘也循其柄而視之有字一行曰姚江黃廷璽伯震方驚駭未決府君出而相視若夢寐慟哭失聲道路觀者亦嘆息泣下時伯震已有田園妻子於道州府君卒挽之而歸楚人高其義稱伯震爲黃來稱府君爲小來望其復來也府君因其聲轉之別號爲小雷